

## ATODLEN 1

Rheoliad 4

### Adeiladu a dylunio canolfannau

## RHAN 1

### Canolfan gwarantîn CE

O ran y ganolfan—

- (a) rhaid bod ganddi letyad i anifeiliaid buchol, gan gynnwys cyfleusterau ynysu nad oes unrhyw dramwyfa uniongyrchol rhyngddynt â'r lletyad arferol i anifeiliaid buchol;
- (b) rhaid iddi gael ei hadeiladu fel bod modd i'r lletyad i anifeiliaid buchol gael ei lanhau a'i ddiheintio'n rhwydd; ac
- (c) rhaid iddi gael ei hadeiladu neu ei hynysu yn y fath fodd ag i atal unrhyw gyffyrddiad â da byw sydd y tu allan iddi.

## RHAN 2

### Canolfan gasglu CE neu ganolfan gasglu ddomestig

O ran y ganolfan—

- (a) rhaid bod ganddi o leiaf—
  - (i) lletyad i anifeiliaid buchol, gan gynnwys cyfleusterau ynysu nad oes unrhyw dramwyfa uniongyrchol rhyngddynt â'r lletyad arferol i anifeiliaid buchol;
  - (ii) cyfleusterau casglu semen, gan gynnwys ystafell ar wahân i lanhau a diheintio neu sterileiddio cyfarpar;
  - (iii) cyfleusterau lle gellir prosesu semen, a'r rheini'n gyfleusterau nad oes rhaid iddynt fod ar yr un safle; a
  - (iv) ystafell gwarantîn ar gyfer semen, nad oes rhaid iddi fod ar yr un safle;
- (b) rhaid iddi gael ei hadeiladu neu ei hynysu yn y fath fodd ag i atal unrhyw gyffyrddiad â da byw sydd y tu allan i'r ganolfan;
- (c) rhaid iddi gael ei hadeiladu fel bod modd i'r lletyad i anifeiliaid buchol a'r cyfleusterau ar gyfer casglu a phrosesu semen a'r ystafell gwarantîn ar gyfer semen gael eu glanhau a'u diheintio'n rhwydd; ac
- (ch) rhaid iddi gael ei dylunio yn y fath fodd ag i wahanu'r lletyad i anifeiliaid buchol oddi wrth y cyfleusterau prosesu a bod y naill a'r llall yn cael eu gwahanu oddi wrth yr ystafell gwarantîn ar gyfer semen.

## RHAN 3

### Canolfan storio CE neu ganolfan storio ddomestig

O ran y ganolfan—

- (a) rhaid iddi gael ei hadeiladu neu ei hynysu yn y fath fodd ag i atal unrhyw gyffyrddiad â da byw sydd y tu allan iddi; a
- (b) rhaid bod ganddi ystafell storio semen y gellir ei glanhau a'i diheintio'n rhwydd.